



**SEBAHAGIAN** daripada pelajar dan mahasiswa yang mengikuti AKDBB, pada Khartis.

## AKDBB teruskan jelajah ke Sandakan

Oleh **NOORASVILLA MUHAMMA**

noorasvilla@yahoo.com

UB 07-07-2012 AS

**SANDAKAN:** Aman Kampus Di Bawah Bayu (AKDBB) meneruskan siri jelajahnya di Sabah dengan mengunjungi lebih 300 pelajar sekolah menengah di daerah ini, pada Khamis.

Ia merupakan kesinambungan Aman Kampus pertama, kedua dan fasa Kenyalang yang menjelajah ke setiap negeri di Semenanjung Malaysia dan Sarawak bertujuan menyelami isi hati masyarakat dan golongan mahasiswa.

Bertemakan 'Anak Muda Turun Berbakti', fasa AKDBB membariskan 130 mahasiswa dan urusetia dari Semenanjung Malaysia dan Sabah seperti Universiti Malaysia Sabah, Universiti Teknologi Mara, Kolej Yayasan Sabah dan Politeknik.

Antara daerah yang dijelajahi termasuk Kota Kinabalu, Beaufort, Labuan, Sipitang, Tenom, Keningau, Tawau, Semporna, Ranau, Kota Belud dan Tuaran selain Sandakan.

Berucap merasmikan AKDBB di Sandakan, Ahli Dewan Undangan Negeri (Adun) Gum-Gum, Datuk Zakaria Edris berkata program itu berupaya memupuk perpaduan, dan memberi peluang kepada mahasiswa terutama dari luar untuk mempelajari dan mendalami budaya masyarakat Sabah.

"Program ini secara tidak langsung memupuk semangat kerja berpasukan dan bekerja dengan masyarakat, menimba pengalaman kehidupan bersama masyarakat

kampung sekaligus melatih kemahiran komunikasi," katanya pada program itu di Dewan SMK Agama di Sandakan.

Hadir sama, Pengerusi Sekretariat Gagasan Aman Kampus Nasional merangkap Presiden Aspirasi Malaysia, Mohd Shahar Abdullah, Pengetua SMK Agama Sandakan, Roslan Diming dan Pengerusi Mapim Sandakan, Otoh Sibek.

Menurut Zakaria, pengisian dalam AKDBB banyak memberi maklumat berguna kepada golongan pelajar dan mampu melahirkan pelapis pemimpin pada masa hadapan yang berfikir terbuka dan berupaya meluahkan idea secara kreatif dan inovatif melalui saluran yang betul.

"Saya melihat kehadiran aman kampus mampu memberi maklumat yang tepat kepada masyarakat mengenai dasar kerajaan yang sedang dijalankan," katanya.

AKDBB yang dijalankan bermula 27 Jun hingga 9 Julai ini bertujuan memberi ruang dan peluang kepada anak muda untuk turun berbakti dalam menyuntik kefahaman terhadap kepentingan pendidikan dan kejelasan struktur sosial melibatkan masyarakat khususnya di kawasan pedalaman.

Ia juga bertujuan memperkasa budaya kebersamaan dalam menjalinkan semangat muhibah ke arah mencapai keyakinan mutlak 1Malaysia sekaligus menyediakan platform kepada anak muda dalam menyelami pemikiran, merasai denyut nadi serta mendengar suara hati masyarakat.